

## **Balinese - Karahayuan Cakepan Sucine - Salvation Scriptures**

**Epesus 2:2 Daweg punika semeton malaksana satinut ring silakraman jagate sane corah; semeton pada satinut ring kakuasan sane ngreh akasane, inggih punika kakuasan sane ngreh anake sane nyapa kadi aku arepa ring Ida Sang Hyang Widi Wasa.**

**Matius 6:10 Pamrentahan Palungguh Aji mangda kadegang, pakarsan Palungguh Aji mangdaja mamargi iriki ring mrecapada, sakadi ring suarga.**

**Lukas 22:42 "Duh Aji, bilih Palungguh Aji ledang, kaonangja kasangsarane puniki saking Titiang. Nangingke sampunang kalaksanayang manut sakadi manah Titiange, sakewanten wantah pakarsan Palungguh Aji sane patut mamargi."**

**Johanes 16:7-9 Nanging Guru ngorahang teken cening: Sasajaane yening Guru luas, gede pesan gunanne buat cening; sawireh yening Guru tusing luas, Ida Sang Panulung tusing lakar ngrauhin cening. Nanging yening Guru luas, ditu Guru lakar ngutus Ida buat ngrauhin cening. 8 Tur disubane Ida rauh, Ida lakar nyinahang teken isin gumine, mungguing salah baana ngresepang unduk dosa, unduk ane patut muah unduk tetepasan Ida Sang Hyang Widi Wasa. 9 Ia pada pelih baana ngresepang unduk dosa, sawireh ia tusing pracaya teken Guru.**

**2 Timotius 2:10 buina majalaran Orta Rahayune ento, tiang sabar nandangin saluiring paundukan pabuat kaula seselikan Ida Sang Hyang Widi Wasa, apanga ia pada molih rahayu sajeroning Ida Sang Kristus Yesus, maduluran kaluihan ane langgeng.**

**Roma 15:20,21 Tiang tansah sarat nglumbrahang Orti Rahayune punika ring genah sane durung naen miragiang indik Ida Sang Kristus, mangda sampunang tiang nyujukang wewangunan ring duur dasar sane sampun kapasang antuk anak lianan. 21 Sakadi kecap Cakepan Sucine sapuniki: "Anake ane tonden kaortain unduk Idane, anake ento lakar ningalin. Anake ane tonden taen ningeh, anake ento lakar pada ngresep."**

**Pamargin Parautusan 2:36,37 Dadosipun sawatek bangsa Israel patut sami pada tatas uning, mungguing Ida Hyang Yesus, sane sampun pentang tur pacek semeton ring salibe punika, Ida sane sampun kadegang dados Panembahan miwah Prabu Sane Kajanjiang antuk Ida Sang Hyang Widi Wasa!" 37 Riway anake akeh punika miragi paindikane punika, sami pada dekdek renyuh manahipune, tumuli ipun pada nunasang ring Dane Petrus miwah parautusane sane lianan, sapuniki: "Inggih parasemeton,**

**punapike sane patut laksanayang tiang?"**

**Ibrani 4:2 Santukan iraga sampun miragi indik Ortí Rahayune, pateh sakadi dane taler sampun miragi. Dane sampun miragi Ortí Rahayune punika, nanging Ortí Rahayune punika tan ngawinang dane rahayu, santukan rikala dane miragiang, dane tan pracaya ring Ortí Rahayune punika.**

**Yeremia 24:7 Ulun lakar nutdut kenehne apang ia dot nawang mungguing Ulun Sang Hyang Widi Wasa. Sasubane keto ia lakar dadi kaulan Ulune, tur Ulun lakar dadi Widinnyane, sawireh ia lakar mabalik sig Ulune saking nekeng ati.**

**Pamargin Parautusan 16:14 Saking pantaran anake sane miragiang baos tiange, wenten anak eluh adiri sane mawasta Lidia, saking kota Tiatira, geginanipune madagang wastra ungu. Ipun mula anak eluh sane astiti bakti ring Ida Sang Hyang Widi Wasa. Ida Sang Panembahan raris nutdut manahipune buat nelebang baos Dane Paulus.**

**Matius 13:14,15 Dadinne tegep sabdan Ida Sang Hyang Widi Wasa ane kawarahang olih Nabi Yesaya, ane kene: Ragane lakar madingehang, tur madingehang nanging tuara ngresep, ragane lakar ningalin tur nlektekang, nanging tusing bakal nepukin. 15 Sawireh pepineh bangsane ene suba peteng, tur kupingne suba tebel, buina paningalane suba ngidem, apanga ia eda kanti nepukin aji paningalane, tur ningeh aji kupingne, laut ia ngesehin pepinehne tur mabalik nyungsung Ulun kanti Ulun nyegerang ia.**

**Yesaya 6:9,10 Ida raris ngandikayang tiang mamargi buat ngrauhang pawarahe puniki ring rakyate kadi asapuniki: "Yadian ping kuda-kuda kita madingehang, nanging kita tuara ngresep, yadian kita sai-sai medasin, nanging kita tusing nawang unduk ane kasidan." 10 Sasampune punika Ida raris ngandika ring tiang sapuniki: "Dadiangja pepineh rakyate ento belog, tur kupingne bongol muah matanne buta, apanga ia eda kanti nepukin wiadin ngresep. Sawireh yen ia nepukin, ningeh wiadin ngresep, pedas ia lakar pada kase gerang."**

**Markus 4:11,12 Pasaur Idane: "Cening kalugra nawang pepingitan unduk Ida Sang Hyang Widi Wasa ngadegang Pamrentahan Idane di gumine. Nanging buat anake ane lenan, saluiring paundukan katuturang aji pangande, 12 apanga: Yadiastu ia ngiwasin, ia tusing nepukin. Yadiapin ia ningeh, nanging tusing ngresep, sawireh yen ia nawang unduke ento, ia lakar mabalik astiti bakti teken Ida Sang Hyang Widi Wasa tur ia bakal icen Ida pangampura!"**

**Johanes 12:39,40 Ipun tan mrasidayang pracaya, santukan malantaran Nabi Yesaya, Ida Sang Hyang Widi Wasa taler sampun masabda sapuniki: 40 "Matanne suba dadiang Ulun buta, apanga matanne tusing**

**ningalin, tur pepinehne suba dadiang Ulun belog bengkung, tur pepinehne tusing ngresep, apanga ulihan keto ia tusing nyidayang mabalik sig Ulune laut segerang Ulun."**

**Roma 11:7,8 Raris sapunapike mangkin? Bangsa Israele, ipun tan prasida mamangguh paindikan sane ulati ipun. Nanging anake sane akedik, sane sampun kaselik antuk Ida Sang Hyang Widi Wasa, ipun sane mamangguh. Tur jadmane sane lianan, ipun sampun mamongol arepa ring dauh pangandikan Ida Sang Hyang Widi Wasa. 8 Sakadi kecap Cakepan Sucine, sapuniki: "Ida Sang Hyang Widi Wasa nadiang ia pada belog punggung; kanti kayang jani ia tusing nyidayang ningalin aji paningalane wiadin ningeh baan kupingne."**

**2 Tesalonika 2:10,11 kadulurin antuk pangindrajala mawarni-warni marep ring anake sane pacang sirna. Ipun pacang sirna, santukan ipun tan nyak nampi miwah nyungkemin kasujatian sane ngawinang ipun molih rahayu. 11 Punika awinanipun Ida Sang Hyang Widi Wasa ngutus kawisesan sane nguluk-uluk ipun, mangdane ipun pracaya ring paindikan-paindikan sane palsu.**

**Matius 13:18-23 "Ento krana padingehangja piteges pangande anak ane nyambeh bibite ento. 19 Asing-asing anak ane ningeh sabda unduk Ida Sang Hyang Widi Wasa ngadegang pamrentahan Idane, nanging ia tuara ngresep teken sabdane ento, ento patuh buka bibite ane ulung di lubukane. Lantas teka I Jaat ngrampas sabda ane kasambehang di pepineh anake ento. 20 Bibite ane ulung di tanahe ane madasar batu paras, ento anak ane ningeh sabdane tur enggal ia nampi saha liang. 21 Nanging sabdane ento tusing makah dalem di kenehne, tur tusing makelo tuuhne. Dikalane ada sangsara wiadin kakewehan uli krana sabdane ento, ia lantas mundur. 22 Ane mentik di tengah ketkete, ento anak ane madingehang sabdane, nanging sabdane ento kakalahang baan kasumangsayan idup di gumine muah kuduan teken kasugihan, kanti tusing nyidayang mabuah. 23 Ane kasambehang di tanahe ane lemek, ento anak ane madingehang sabdane tur karesep-resepang di ati. Ento krana ia mabuah, ada tikel ping satus, ada tikel ping nem dasa ada ane tikel ping telung dasa."**

**2 Korintus 3:15,16 Kantos rauh mangkin, sabilang ipun mamaosin cakepan dane Nabi Musa, pepinehipune kangkebin. 16 Nanging angkebe punika kabukak, manut kecap Cakepan Sucine, kadi asapuniki: "Angkeb prarain Dane Musa kabukak, rikala dane manjing ka ayun Ida Sang Panembahan."**

**Yesaya 30:28 Ida ngawinang angine mampeh ring ajeng Idane tan bina sakadi blabar sane nganyudang saluiring sane wenten. Pidukan Idane**

**punika nyirnayang parabangsane tur ngusanang rencanannyane sane jaat.**

**Hosea 11:3-7 Tuah Ulun ane ngurukang Israel majalan. Ia sangkol Ulun aji liman Ulune nanging ia tusing nyak ngangkenin mungguing Ulun ane ngempu ia. 4 Ulun ngedeng ia aji kapitresnan muah sayang. Ulun nyemak ia tur neketang ia di pipin Ulune. Ulun ngeedang raga tur madaarin ia. 5 Ia tusing nyak malipetan teken Ulun, ento krana ia patut malipetan ka Mesir, tur Asur lakar mrentah ia. 6 Perange lakar nyampatang kota-kotannyane tur nguug gapuran kotane. Perange ento lakar ngenyagang kaulan Ulune sawireh ia suba nglaksanayang unduk ane kadena melah. 7 Ia pageh ngalah tundunin Ulun. Ia lakar jerit-jerit uli krana uga ane magantung sig baongnyane, nanging tusing ada anak ane lakar ningtingang ugane ento uli baongnyane.**

**Pamargin Parautusan 26:18 Kita patut nyedangang paningalan bangsa-bangsane ento, tur lakar malikang ia uli di petenge ngungsi ka galange muah uli kakuasan Ratun Setane ka sajeroning rehrehan Ida Sang Hyang Widi Wasa, apanga malantaran pracaya teken Ulun, ia lakar maan pangampura buat dosa-dosannyane, tur nampi tegaknyane di pantaran bangsa seselikan Ida Sang Hyang Widi Wasa."**

**2 Timotius 2:24-26 Parekan Ida Sang Panembahan tusing patut maiegan. Parekane ento patut darma marep teken anake makejang, patut dadi guru ane melah muah sabar, 25 ane bisa mituturin musuh-musuhne baan raos ane nyunyur manis. Dumadak Ida Sang Hyang Widi Wasa maicayang sela teken anake ento buat ngesehin pepinehnyane, ngutang dosa-dosannyane, apanga ia nawang kasujatian. 26 Yen suba keto ia lakar inget teken dewekne laut ngelesang dewekne uli jeet Ratun Setane ane suba negul ia buat nyalanang sakita karep Ratun Setane ento.**

**Wahyu 3:17-19 Kita ngorahang: 'Tiang sugih, buina liu ngelah arta brana, tiang suba tusing kuangan apa!' Nanging kita tusing nawang ambate mlarat muah nistan kitane. Kita tiwas, malalung muah buta. 18 Sawireh keto, Ulun mituturin kita, apang kita meli mas ane murni teken Ulun, apanga kita sugih. Buina beli masih panganggo putih, anggon nganggoin dewek kitane, buat ngangkebin dewek kitane ane malalung, ane ngranayang kimud, buina beli masih ubad anggo ngubadin matan kitane, apanga kita nyidayang nepukin. 19 Anake ane tresnain Ulun, ia glemekin tur tigtig Ulun. Wireh keto pada telebangja tur kutangja dosa-dosan kitane.**

**2 Korintus 7:10 Santukan sungsute sane kagunayang antuk Ida Sang Hyang Widi Wasa punika, ngawinang semeton meseh pepineh tur nuntun semeton ka jeroning karahayuane. Punika awinane tan wenten sane**

**buat kapangenang. Nanging sungsute sane saking jagate iriki, punika  
sane nyidayang nuntun semeton ka sajeroning pati.**

**1 Pararatu 18:37 Daginginja pinunas titiange, duh Ratu Sang Hyang Widi  
Wasa! Daginginja pinunas titiange, mangdane rakyate puniki uning  
mungguing Palungguh IRatu punika Sang Panembahan sane maraga  
Widi, tur Palungguh IRatu sane ngawinang manah ipune malih astiti  
bakti ring Palungguh IRatu.”**

**2 Korintus 4:4 Ipu nenten pracaya, santukan manahipune sampun  
kabutayang antuk I Setan, pamimpin sane jaat, sane mrentah jagate  
puniki. I Setan nyadelin ipun, mangda ipun nenten manggihin galang  
sane nyinarin ipun, inggih punika galang sane masinar saking Orti  
Rahayu indik kaluihan Ida Sang Kristus punika, santukan wantah  
malantaran Ida Sang Kristus, Ida Sang Hyang Widi Wasa nyinahang  
ragan Idane.**

**Lukas 8:11-15 "Kene artin pangandene ento: Bibite ento, nah ento sabdan  
Ida Sang Hyang Widi Wasa. 12 Ane ulung di lubukane, nah ento anak ane  
suba madingehang sabdane ento, nanging teka Ratun Setane mancut  
sabdane ento uli di kenehne, apanga ia buung pracaya muah  
karahayuang. 13 Ane ulung di tanahe ane madasar paras, nah ento,  
anake ane ningehang laut nrima sabdane ento saha liang, nanging tusing  
mateleb di kenehne. Ia gangsar pracaya, nanging dikalane katempuh  
baan gegodan, ia lantas mabalik. 14 Ane ulung di tanahe ane misi  
tunggak-tunggak ketket, nah ento anake ane madingehang sabdane  
ento, nanging ia kaliput baan jejeh muah kasugihan muah kawiryan idup  
cara di jagate, kanti tuara nyidayang mabuah ane melah. 15 Ane ulung di  
tanahe ane lemek, nah ento anake ane madingehang sabdane ento, laut  
nelebang di tungtung kenehne saha astiti bakti teken Ida Sang Hyang  
Widi Wasa. Ia anteng tur teleb, kanti bibite ento mabuah."**

**Pamargin Parautusan 15:11 Sampunangja sapunika! Iraga pracaya tur  
karahayuang malantaran sih pasuecan Ida Hyang Yesus. Kadi asapunika  
taler ipun."**

**Roma 8:13 Santukan yen semeton urip satinut ring saparimanah  
kamanusan semetone, semeton pacang padem; nanging yening  
malantaran pitulungan Roh Ida Sang Hyang Widi Wasa semeton  
ngamademang laksanan semetone sane corah, semeton jaga molih urip.**